

SAN ANTOLIN, Martiria (09/02)



Sarrera-oharra

Palenciako zaindari dan santu martiri honen bizitzaz ezer gitxi jakin daiteke. Espainiakoa zan? Frantziako Pamiersekoa? Siriako Apameakoa? Badirudi IV. gizaldian Diokleziano enperadorearen aldietan hil ebela: samea moztu eta bere gorputz-atalak sakabana-tu egin ebezala. XVII. gizaldian Palenciako katedraleko Kabildoak batu nahi izan ebazan gorpuzkinak, baina ez eben ezer ere lortu, Calvinotarrek ostu eta desegin ei ebezala-eta.

Haren omenez alkartzen gara gu otoizgiroan. Sinismena indar-tzearren eta gaurko egunetan, Antolinen antzera, Jesu Kristoren jarraitzaile izan gura dogulako? Holan bada, haren bidez eskatu deiogun Jainkoari grazia hori, eta alkar adoretu

daigula kristau bizitzea gaurkotasunez bizi izaten.

HITZAREN LITURGIA

Irakurgaiari oharra

Inoiz be ez da erreza izan Jesusen jarraitzaile izatea; jarraitzaileek beti jasan dabez erasoaldiak. Norberagan dago zintzotasunez erantzutea, besteekaz batera Eleiza egitea.

Burruka gogorra egin behar izan zenduen.

Hebrearrei egindako epistolatik Heb 10, 32-36

Senideok: hartu-barri haretan, burruka gogorra eta neketsua egin behar izan zenduen. Gogoratu eizuez hasierako egun hareek: fedearen argia.

Zuetako batzuek irainak eta tratu txarrak jasan zenduezan guztien aurrean; besteok, holan erabilitakoen lagunkide izan zinien; giltzapetuen oinazeetan parte izan zenduen eta pozik sufridu zenduen zeuen ondasunak kendu eutsueezanean, jakinik aberastasun hobe eta iraunkorragoa zenduela.

Ez galdu, beraz, adorea, beragaz sari handia dakar-eta. Iraupena behar dozue, Jainkoaren nahia betez agintzaria eskuratzeko.

Jaunak esana

Erantzun salmoa (Sal 126 [125], 1-2ab. 2cd-3. 4-5. 6 (R/ ik. 5))

Neketsua egiten jaku lana, eta poztu egiten gaitu sariak. Baina, izan gogoan: ebanjelioaren saria bera iragartea da, Jaunaren testigu izatea.

Ebanjelioa (Lk 9, 23-26)

*Bere bizia Nigaitik galtzen dauanak
salbatu egingo dau.*

† Jesu Kristoren Ebanjelioa San Lukasen liburutik

Aldi haretan, Jesusek hauxe esan eutsen guztiei: «Nire ondoren etorri gura dauanak uko egin beio bere buruari, hartu begi eguneroko bere kurutzea eta jarraitu beist. Izan be, bere bizia salbatu gura dauanak galdu egingo dau; baina bere bizia Nigaitik galtzen dauanak salbatu egingo dau».

Zertarako dau gizonak edo emakumeak mundu guztia irabaztea, bere bizia galtzen eta hondatzen badau?

Beraz, inor nitaz eta nire mezuaz lotsatzen bada, Gizonaren Semea be lotsatu egingo da haretaz, bere aintzarekin, bere Aitaren aintzarekin eta aingeru santuen aintzarekin etorriko danean».

Jaunak esana

Homilia

HERRI OTOITZA (Eskariak)

Jainko Aitak bizitzara ekarri gaituanetik eta gehiago, ondasunez beteten gaitu. Aurkeztu deioguzan gure beharrizanak eta eskatu:

—Eleizearen alde: santuen bizitza aurkezten jakin daian, eta guretzat eredu izan daiten, *eskatzen deutsugu, Jauna*.

R/. ZEUGAN DOGU USTE ONA

—Eleizatik urrunduz, Jainkoagazko hartu-emonik barik gelditu diranen alde: Jainkoaren maitasunagaz topo egin daien...

—Santuak azaletik omentzen dabezenan alde: Jesusen jarraitzaile izateko eredutzat ere izan daiezan...

—Eukaristia honetara hurreratu garanon alde: santuak eta hareen irabaziak ez daiguzan alperrik erabili eta eralgi, bilatu daigun baino benetako gogo-osasuna...

† Zeruko Aita/Ama ona: zure santuen bizikieran zeu gorestekoko eta aintzaltzeko erea eta indarra aurkitu daiguzala. Jesu Kristo gure Jaunaren bitartez.

—Amen.

Azkenean

Jesu Kristoren jarraitzaileok, santuak eredu doguzala, gure bizitzaldia besteen onerako eralgiten dogu, batez ere aldi egokiak ez diranean. Gure eginbeharra, ba, alkar adoretzea da; daukagun eleiz senitartea bizkortzea; eta daukagun Eleizea gaurkotzea, ateak zabalik izatea eta behartsuen bila urtetea. **Antolinek** bultzatu gaizala eginkizun horretan.

